

Ngā Whiriwhiri mō te Whakaaetanga Hokohoko Utukore i waenga i Peretānia me Aotearoa Ko Ngā Whāinga Mātāmua ka whiriwhiria

Ko te whāinga nui o Aotearoa kia mutu wawe te whai i te tētahi Whakaaetanga Hokohoko Utukore (FTA) ki Peretānia (UK) e kounga ikeike ana, e mārama ana, e wātea ana kia whai wāhi mai te katoa.

Ko ēnei mātāpono e ono ka ārahi i te kokenga o Aotearoa i roto i ngā whakahaere whiriwhiri:

- Kia whai āheinga āmiki, e whaihua arumoni ana hoki mā te whakakore i ngā tāke hokohoko tāwāhi me ētahi atu ārai e kōpiri nei i ngā mahi hokohoko rawa, ā-ratonga hoki me ngā mahi haumi, ko te takune hoki o te mahi nei kia whakatū mahi, kia whakaara anō te tipu matomato ā-tōnui o Aotearoa;
- Kia whakaū te mana o te whakaaetanga kia whakamana anō i ngā tika o ngā kāwanatanga kia waeturehia tāna e pai ai hei painga mō āna pononga, inarā ngā kaupapa taiao, tuku mātauranga, hauora me te oranga whānui o ngā tāngata katoa o Aotearoa.
- Kia whakauka te mana motuhake o Te Tiriti o Waitangi;
- Kia ātete te whai wāhitanga mai o ngā hātepe Whakatau Nawe i waenga Kaihaumi me te Kāwana
- Kia whakaata mai [ngā mātāpono mātāmua o te kaupapa Hokohoko mō te katoa](#) o Aotearoa me te aro ki te Hokohoko me te whakawhanake e toitū ai ngā kaupapa (te taiao, panoni āhuarangi me te mahi) me te hokohoko e wātea ana kia whai wāhi mai te katoa, inarā te whai wāhitanga o te iwi Māori, wāhine me ngā pakihi iti, wawaenga hoki;
- Kia pūataata te whakahaere o te hātepe, ā, kia whai i ngā whakaaro o te hunga mātanga, me ngā whakaaro o ngā tāngata o Aotearoa whānui e hua mai ai ngā putanga e hiahiatia ana kia puta mai i te whakaaetanga.

Ko tā te kōwae ki raro nei he whakatakoto i ngā whāinga tuatahi, heoi ka tīni pea i te taenga mai o ngā kōrero me ngā whakaaro o Aotearoa whānui.

HOKOHOKO RAWA

Hokohoko o Ngā Rawa

- Ko tā te FTA, me hiki i ngā tāke hokohoko tāwāhi i waenga i Aotearoa me Peretānia. Me hiki te nuinga o ngā tāke hokohoko tāwāhi i te whakamanatanga o te whakaaetanga, ko te toenga atu me memeha atu i roto i te wā poto e whaihua arumoni ana.
- Me taunaki ēnei whakahaere ki ngā whakaritenga e whakakore ana i ngā ārai tāke hokohoko tāwāhi kore, o nāiane me anamata e kōpiri nei i te mahi hokohoko i waenga i ngā taha e rua.

Ngā Ture Ahunga

- Me tōkeke, me māmā, me pūataata, me whaihua hokohoko anō ngā ture ahunga, me whakamōkito hoki te utu e taea ai ngā pakihi te whai wāhi mai.
- Me whakaata mai ngā ture i te mātāpono 'tīnīhanga tūturu' ā, me whai pakiaka mai i te ture 'tīni kōmakatanga ā-tāke hokohoko tāwāhi' kia tohu ahunga. Ko ētahi atu mātāpono whakahirahira, ko tētahi kokenga hoahoa ture e whaihua ā-whakataetae, e titiro anō hoki ki anamata, kia whakatūturu i te āheinga o ngā pakihi ki te tipu matomato, ki te whai i ngā kaupapa auaha anō hoki.
- Me mārama pū anō ngā ture, me māmā noa te whakamahi me te whakahaere, me māmā hoki te whakamahinga, me te utu o ngā tukanga whakaū ahunga. Ko te tikanga, kia tohua motuhaketia e

ngā kaihokohoko ki uta, ki tai hoki, kei te taumata e tika ana ā rātou rawa ki tā ngā ture ahunga o te FTA e kī ai. Kei a rātou hoki te tikanga mō ā rātau ake hiahia ā-tāke hokohoko tāwāhi.

Ngā Tukanga Mana Ārai

- Me pūataata ngā tukanga Mana Ārai e taea ai te matapae, te āwhina hoki i ngā whakahaere ā-hokohoko. Me mātua whakakaha anō i ngā whakaaetanga kua mana kē pēnei i te Whakaaetanga Whakahaere Hokohoko WTO.
- Me pūataata ēnei tukanga mā te whakaū i te āheinga o ngā kaihokohoko kia whai wāhi ki ngā pūrongo e hāngai ana ki te mahi hokohoko, me ngā whakatau teitei mō te kōmakatanga, ahunga, me te uaratanga ā-hokohoko i tāwāhi. Me whakakaha anō i te āheinga kia puta wawe mai ngā rawa, hei taurira mā te kaha whakamahi i ngā pūnaha hangarau kia whakawātea mai i ngā kauterenga i mua i te taenga mai; ngā angawā mō te whakawātea i ngā kauterenga; ngā tukanga whakaterere kia tere te tuku o ngā kauterenga me ngā taputapu ka tipoko haere.
- Me whakatōmene i ngā āhuatanga pēnei i te mōhio tahi o ngā kaupapa Kaihokohoko Pono, kia taunaki i ēnei putanga.

Ngā Whakaora ā-Hokohoko

- Me whai rautaki whakaora ā-hokohoko te FTA e whakaata mai i ngā ture WTO kua mana kē mō te ārai-parahanga, ngā maru, ngā pūtea tāpiri, me ngā kaupapa tango painga ā-pūtea tāpiri. Ka whakamātau hoki mātou i ngā tonono e whai nei i te pūataata me te whakahaere tika, i roto i ngā whakahaere rongoā ā-hokohoko.

Ngā Ārai Hangarau ā-Hokohoko (TBT)

- He wāhanga whakahirahira ki Aotearoa, ngā kaupapa whakamana e hāngai ana ki te whakakore i ngā ārai kāore i hua mai i te tāke hokohoko tāwāhi. Ko tā mātou e whai nei, kia hua mai tētahi wāhanga TBT e whakakaha ana i te Whakaaetanga TBT o te WTO, e whakawhāiti anō i ngā whakararu me ngā utu ā-hokohoko i te ahumahi hokohoko ki tāwāhi.
- Ko te tikanga, ko tā te wāhanga TBT he whakakaha ake i te whakaaetanga whānui o ngā paerewa e tika ana, ngā waeture ā-hangarau me ngā otinga aromatawai whakaōrite, waihoki rā kia whakatenatena i te mahi tahi o ngā hinonga waeture, tae atu ki te hīkinga mai o ngā ārai kāore i te hāngai ki te tāke hokohoko tāwāhi.
- Me whakatōmene anō te whakaaetanga i ētahi āpiti ā-kaupapa, take ā-rāngai anō hoki e hāngai ana ki ngā wāhanga kua tohua mai e te hunga whaipānga, he painga ka puta ki te mahi hokohoko i waenga i Aotearoa me Peretānia.

Ngā Tikanga Whakarite Haumarutanga Tangata, Kararehe me ngā Tipu (SPS)

- Ka whakamanahia tonutia, ka whakapakari anō i te taumata kōunga o te Whakaaetanga Rata Kararehe i waenga i Peretānia me Aotearoa, e āhei ai te whakarite kia pēnā anō mō ngā kai me ngā tipu he nui te tukatuka me ngā hua tipu.
- Me whakaū, me whakapakari anō te wāhanga SPS, i te whakaaetanga SPS o te WPO kua mana kē e taea ai e Aotearoa ngā mahi e tika ana ki te tiaki i te oranga me te hauora o ō tātou tāngata, o ā tātoukararehe, rākau hoki; tae rā atu ki te whakatū pūnaha kia whakatau i ngā raru ā-āheinga uru māketete mā te waiora tōkeke, mā ngā mōhio pūtaiao anō.

- Me whakamana hoki te whakahaere tika o te Whakaaetanga Rata Kararehe kua mana kē i waenga i ngā taha e rua, me hanga ture kia tiakina te taiao a Tāne me ngā kaupapa haumarukai kāore i whai wāhi ki raro i te Whakaaetanga Rata Kararehe me te whakatū anō i ētahi hātepe kia tika, kia kouna te whakawhitiwhiti kōrero mō ngā kaupapa SPS i waenga i ngā mana e whaitake ana.

HOKOHOKO Ā-RATONGA ME TE HAUMITANGA

Hokohoko ā-Ratonga

- Me mōhio te FTA ki te nui o ngā hokohoko ā-ratonga o nāianei i waenga i Aotearoa me Peretānia, me whakatū āheinga hou, me te whakaūnga o te whai wāhitanga o ngā kaihokohoko ki tāwāhi. Me whakaata mai anō te āheinga me ngā mātāpono o te WTO, tae atu rā ki te mōhio ki ngā tika o ngā kāwanatanga ki te hanga waeture mō ngā kaupapahere e tika ana mō te motu whānui.
- Me hōrapa i te whakaaetanga nei ngā āhua whakaputunga me ngā rāngai katoa. Me whakaū te whai wāhitanga ā-māketete me te whakahaere ōrite o ngā kaiwhakataetae ā-rohe me ngā kaihokohoko ā-ratonga i whenua kē, i raro i te mana o te whakaaetanga.
- Arā ētahi wāhanga me kōpiri āheinga mā Aotearoa me Peretānia anō. Ko ngā aukatinga nei me whakatakoto pūataata mai i tētahi kokenga whai rāngi āpitirua tōraro.
- Me tautoko ēnei herenga āheinga māketete ki ngā ture e whakaū ana i ngā tukanga whakamana – ina me mātua tāpae tonu te kaihokohoko ki tāwāhi i mua i te tuku ratonga - e whakahaerehia ana i runga i te tikanga pūataata, whaikaha anō.
- Ka hiahia pea a Peretānia ki te whakatōmene i ngā kokenga e hāngai atu ana ki ētahi rāngai. Ka āta whakaarohia ēnei kokenga, mehemea ka mātua whakaata mai ēnei i ngā hiahia ōrite me ētahi rāngai e whāia ana e Aotearoa i te painga ka puta ki te ahumahi hokohoko ki tāwāhi.

Te Nekehanga o ngā Tāngata Pakihi

- He āhuatanga whakahirahira te āheinga o ngā tāngata pakihi te neke i waenga whenua mō ngā take hokohoko me ngā take haumitanga, mā konei e taea ai te tipu matomato o tā tātou hononga arumoni ki Peretānia.
- Kia whakaata mai te hiahia o te hunga whaipānga whānui o Aotearoa, ka whāia rawatia e mātou kia pai ake te whai wāhitanga puta noa i ngā momo pakihi (manuhiri ā-pakihi, ngā kaimahi whakawhiti wāhi mahi, ngā kaitāuta, ngā kairatonga me ngā tāngata ngaio motuhake). Me whai pakiaka tēnei i ngā whakaritenga e āhei ai te whakateretono ā-urūwhenua me te hātepe tātari, tae atu rā ki te āheitanga kia whai pūrongo e tika ana ki te tuku tonu ā-urūwhenua.

Haumitanga

- Ko Peretānia tētahi o ngā hoa whakahirahira o Aotearoa mō te haumitanga, hei wāhi ahunga māketete ka tahi, hei tauwāhi māketete ka rua. I roto i te FTA ki Peretānia, kei te hiahia kite a Aotearoa i tētahi wāhanga haumitanga e kouna ikeike ana, e pūataata ana, he anga ture e taea ana te matapae, kia mōhio pū ai ki te āhua o te whakahaere o ngā kaihaumi, me ngā haumitanga o Aotearoa whānui. Me mōhio pū te wāhanga nei ki te rāngi haumitanga ā-roto o Aotearoa, me tiaki anō i ngā kaihaumi me ngā haumitanga o Aotearoa i te UK. Me mana tonu te anga āheinga māketete e whakamahia ana mō te hokohoko ā-ratonga, ki ngā herenga āheinga māketete mō ngā kaihaumi me ngā haumitanga.

- Kāore a Aotearoa i te whakaae ki te whai wāhitanga o ngā whakahaere whakatau nawe i waenga i te kaihaumi me te kāwanatanga i roto i ngā FTA nō reira, kāore mātou e tautoko i tētahi kokenga e pēnei ana te āhua i roto i te FTA ki te UK. Ka huritaona ngā tukanga kāwana ki te kāwana.

TE MOTUHANGA ME ĒTAHI ATU RARU Ā-WAETURE

Hokohoko ā-Matihiko

- Ka whakamahia e Aotearoa ngā āhuetanga i roto i ngā whakaaetanga ā-hokohoko matihiko o te wā, inarā te Whakaaetanga Piritahi Ohaoha ā-Matihiko, kia hanga mai i te pūtake o te wāhanga mō te hokohoko ā-matihiko, ka whakaata mai anō i te wāhanga nei i te hua ka puta ki te tipu me te hauora ā-ohaoha. Ka whai tūranga whakahirahira ngā maru kaupapahere ā-motu whānui me ētahi atu whāinga kaupapahere ā-motu whānui i roto i te kokenga nei.
- Me whakapūmau te FTA i te whakatau whakatōroa ā-ture mō ngā utu ka utua i ngā tāke mana ārai mō ngā whakawhitinga ā-matihiko. Kia whakatakotohia hoki e te wāhanga nei ngā tikanga matatapu pakari, me ngā tikanga ārai kiritaki pakari.
- Me whakatōmene te wāhanga nei i te mahi ngātahitanga ki te UK mō ngā kaupapa pēnei i te mōhiotanga horihori, ngātuakiri ā-matihiko, te tūhonohono ā-matihiko, te haumarutanga me te whakamuna whiti-rangi, me te whakamahi i ngā hangarau me ngā ratonga matihiko mō ngā take mahi tahi ā-pūtaiao, ā-rangahau, tae atu ki te hauora tūmatanui.

Te Tikanga Whakawhiwhi o te Kāwana

- Me whakaata mai te FTA i te pitomata o te tikanga whakawhiwhi o te kāwanatanga kia whakatū āheinga hou i waenga i Aotearoa me Peretānia mō ngā pakihī, me te whakawhanaketanga o ngā tūhononga whakarato rawa hou.
- Ko te tikanga, ko ngā mātāpono ēnā ka hanga mai i te pūtake o te kokenga mō te wāhanga nei, me whakatū i ngā whakaraupapa e taea ana te matapae, e pūataata ana, kāore he kaikiri o roto, hei mana tāhuhu i ngā tikanga whakawhiwhi ā-kāwanatanga e whaitake ana; kia whakaū hoki i te āheinga o ngā kāwanatanga ki te whakamahi i ā rātou tikanga whakawhiwhi kia hua mai he putanga ā-taiao, ā-pāpori me ētahi putanga kē; me whakaū ēnei i ngā herenga whai wāhitanga ā-māketē, me te pūataatanga o ēnei ki ngā kaihokohoko ki tāwāhi.

Mana Whakairo Hinengaro

- I te mea he kaihokohoko iti ki uta a Aotearoa o ngā rawa me ngā ratonga whai mana whakairo hinengaro (IP), me tētahi pūnaha hou, he pai te mahi, ka taurite te āhua o te kokenga o Aotearoa ki te whakamaru i ngā kaupupuri tika ka tahi, ka rua ko te whakamana i te āheinga o ngā tāngata o Aotearoa ki te whānuitanga o ngā rawa me ngā ratonga whai IP, i ngā utu tōkeke.
- Ko te taurite e kitea ana i ngā anga kaupapahere motu-whānui kua tū kē me ngā putanga kua whakaaehia tahitia i te taha o ētahi atu hoa ā-hokohoko tēnā, ka hanga mai i te pūtake i te kokenga o Aotearoa i roto i ana whakahaere, tae atu rā ki te Whakaaetanga WTO mō ngā Āhuetanga Hokohoko ā-Mana Whakairo Hinengaro.
- Me taunaki te wāhanga nei i ngā taha e rua kia whakatū tukanga e pūataata ana te āhua i raro i ā rātou whakahaere IP, kia whakawhāiti hoki i ngā utu whakamana ture, kia whakapoapoa i te auahatanga ā-taiwhenua, kia whakahaere anō te whakawhitinga me te tuku whānuitanga o ngā hangarau, ngā hua me ngā ratonga hou.

Kaupapahere Whakataetae me Ngā Kaupapa Kiritaki

- Ka whāia e Aotearoa tētahi kokenga e whakatenatena ana i te whakamana tonutanga o ngā ture me ngā waeture e ārai ā-ture nei i te whanonga whakapēhi whakataetae, me te whakauruhi i ērā ture, i te taha o te motuhaketanga o ngā mana whakataetae.
- Ka ngana hoki mātou ki te whakatū pūnaha e mahi tahi ai ngā rōpū i roto i ngā kaupapahere ā-whakataetae. Me toro hoki tēnei ki ngā kaupapa uiuinga me te whakaatu, inarā ngā wā kua pāngia te hokohoko me te haumitanga i waenga i ngā pāti e rua e te whanonga whakapēhi whakataetae. Ka whāia tonutia e Aotearoa kia whakamahi kaupapa e ōrite ana kia whakahaumarū mai i te kiritaki i ngā whanonga māminga.

Tikanga Whakahaere ā-Waeture Pai/ Mahi tahi ā-Waeture

- Me whai wāhi mai tētahi wāhanga, e hōrapa puta noa ngā kaupapa katoa o te FTA, e aro atu hoki ki te whakahirahiratanga o te whakahaere tika ā-waeture, me te tūranga whakahirahira o te mahi tahi ā-waeture i roto i ngā whakahaere ā-hokohoko, ā-haumitanga anō. Me mau tonu te wāhanga nei ki ngā tika o ngā kāwanatanga ki te hanga waeture e hua mai ai ngā putanga kaupapahere ā-motu whānui, me whai pūtake hoki i ngā mātāpono teitei, mā ēnei e taea ai te whakawhanake i te whakahaere, te aro tika ki ngā rahinga o whenua kē, me ngā rerekētanga whakahaere ā-kāwanatanga, ā, me whakatū hoki i tētahi pūnaha tere ki te whakautu, iti noa hoki te utu, kia taunaki i te whai whakaarotanga o te mahi tahi ā-waeture i waenga i Peretānia me Aotearoa.
- Me aro hoki te wāhanga nei ki te hiahia mō te pūataatanga i roto i te whakawhanaketanga o ngā waeture, whakatenatena i te whai whakaarotanga ki ngā kōwhiringa ā-waeture, kāore i te hāngai ki te waeture anō hoki kia whakaiti i ngā ārai ki te hokohoko, te aro tika ki ngā pānga ki te hokohoko ā-ao whānui me te haumitanga ki te whakawhanaketanga o ngā waeture, me āhukahuka hoki i te hua o ngā kōwhiringa mahi tahi ā-waeture ōpaki, ōkawa anō hoki.

HOKOHOKO MŌ TE KATO

Ko ngā whāinga "Hokohoko mō te Katoa" o Aotearoa ka tū hei whakaaro mātāmua puta noa i te whakaaetanga. Hei tāpiri ake, ka whāia e Aotearoa ngā putanga pai e hāngai ana ki ētahi kaupapa, tae atu ki hokohoko me te taiao, hokohoko me te mahi, hokohoko me te ira, ngā kaupapa ohanga o ngā iwi taketake, me te hokohoko me te whakawhanaketanga.

Hokohoko me te Taiao

- Me whakaata mai te FTA i ngā putanga o te Anga hou o Aotearoa mō te Tuitui i ngā Putanga ā-Taiao ki roto i ngā Whakaaetanga Hokohoko me ngā tono i ahu mai i te kaupapa Hokohoko mō te katoa (kei te whakaritea tonutia i tēnei wā). Me komokomo hoki ngā āhukatanga o ngā kaupapa i whakatēpuhia e Aotearoa i roto i ngā whiriwhiri mō tētahi Whakaaetanga Panoni Āhuarangi, Hokohoko me te Toitūtanga.
- Me whakakaha anō ngā aronga ā-hokohoko ao whānui, toitū hoki ki ngā rawa me ngā ratonga ā-taiao, ngā pūtea tāpiri ko te whaparu i te taiao te mutunga iho (pēnei i ngā ahumahi hī ika, me ngā pūtea tāpiri mō ngā koranehe) te rerenga rauropi, te ahumahi rākau, te ohanga porowhita, ngā pūnaha hauropi o te moana, ngā ahumahi hī ika me te kōhauhau, tae atu rā ki te panoni āhuarangi. Me whakakaha ngā whakaraupapa pūtea tāpiri ā-ahumahi hī ika, i ngā putanga i

mana mai i ngā whakaaetanga o Aotearoa i ngā marama tata nei, me ngā whiriwhiri WTO mō ngā pūtea tāpiri ā-ahumahi hī ika o nāiane

- Ka taunaki a Aotearoa i te whāinga o ngā pūnaha e whakamana ana i te whakauruhi o ngā herenga ā-hokohoko, ā-taiao hoki i roto i te FTA.

Hokohoko me te Mahi

- Kua roa nei a Aotearoa e mau ana ki te tikanga kia whai wāhi mai ngā herenga pakari ā-hokohoko, ā-mahi anō hoki i roto i ana FTA, tae atu rā ki ngā whakaritenga mahi tahi, uiuinga me te kōrerorero i ngā take mahi.
- Me komokomo te wāhanga nei i ngā herenga e whakamana ai ngā tika me ngā ritenga tūturu ā-mahi i te Whakapuakitanga ILO 1998; ehara i te mea he whakaiti, kia kaua rānei e whakauruhi i ngā ture ā-mahi kia whakatenatena i te hokohoko me te haumitanga; me te mautohe i te whakamahinga o ngā paerewa mahi mō ngā take whakahaumarū. Ka taunaki hoki mātou i ngā pūnaha e whaikaha ana kia whakauruhi tika i ngā herenga ā-hokohoko, ā-mahi anō hoki i roto i te FTA.

Hokohoko me te Ira

- Kei te kite a Aotearoa i ngā āheinga mō tētahi rārangi take e titiro ana ki anamata mō ngā kaupapa hokohoko, me ngā kaupapa ira ki te UK. Ka whāia e mātou ngā putanga e tika ana mā te rahinga o ngā take ā-hokohoko, ā-ira anō hoki, ka rite hoki ki ēnā e whakawhanakehia ana i te taha o ngā hoa kei te ao, tae atu ki te Rōpū Whakahaere Hokohoko mō te Katoa.
- Kei roto ko te whakatōmene kia whakamana ake i te whai wāhitanga o ngā wāhine ki roto i ngā kaupapa hokohoko me te haumitanga, te taunakitanga anō o te whakauruhi o ngā ture e hāngai ana ki noho ōrite o ngā ira, te taunakitanga hoki i ngā whakatau ā-hokohoko, ā-haumitanga anō e whaihua ai te whāinga whakamana ohanga ā-wāhine. Arā noa atu pea ētahi āheinga kia mahi tahi ki te UK kia taunaki i ngā putanga ā-hokohoko, ā-ira anō, tae atu ki ngā mana nui o te ao, pēnei i te WTO me te OECD.

Ngā Kaupapa Ohanga ā-Iwi Taketake

- He āhuetanga whakahirahira te whakamanatanga o ngā take hāngai o te Māori i roto i te FTA ki te UK. Nō reira, ka mahi a Aotearoa ki te whakaae tahi me te UK kia whai i aua putanga, me te whakahaere anō i ngā āhuetanga o te rārangi take Hokohoko mō te Katoa o Aotearoa e hira ana ki te Māori; ka mahi tahi me te UK kia tautoko i te whanaketanga o te ohanga Māori; kia whai tikanga hoki e taea ai te taunaki te whai wāhitanga o te Māori ki ngā mahi hokohoko ā=ao, pēnei i te whai wāhitanga o te Māori ki ngā whakatakanga hokohoko ao whānui.
- Me mau tonu te FTA ki te tikanga aro whānui o Aotearoa mō te wāhi ki te Tiriti o Waitangi, e taea ai e te Kāwanatanga o Aotearoa te hanga kaupapahere ā-taiwhenua e pai ake ai te manaaki o te iwi Māori, kia tutuki rā anō ngā herenga i raro i te Tiriti o Waitangi.

Hokohoko me te Whanaketanga

- Me whakaata ngā kaupapa ā-hokohoko, ā-whakawhanaketanga anō i te painga ka puta mai i te whakawhanaketanga i tētahi taiao hokohoko, haumitanga anō, me te tūranga o te whakawhanaketanga i roto i te tipu haere o te katoa. Ina koa, e hiahia ana mātou ki te huritao mehemea he huarahi anō hei haeretanga mā tāua tahi i roto i ngā whakahaere taiwhenua, ao

whānui hoki kia taunaki i te hokohoko e wātea ana mō te katoa hei āheinga mō te whakawhanaketanga, me te whakatōmene anō i ētahi tono hāngai kia kaha ake te mahi tahi i roto i te Moana-nui-a-Kiwa.

Ngā Pakihi iti, Wawaenga Hoki (SME)

- Me whai wāhi i roto i te whakaaetanga tētahi wāhanga ki te UK e whakaata mai i te whakahirahiratanga o te whakaū i te whai wāhitanga o ngā SME ki ngā hua o ngā FTA, me komokomo hoki i ngā herenga kia taunaki i te whakamahinga whānui o ngā SME kia whai hua ia.
- Me whakawhanake i tētahi anga kia whakaū i te whakahirahiratanga o te whai whakaaro i ngā wero, me ngā āheinga mō ngā SME i roto i te whakawhanaketanga o ngā wāhanga e whaitake ana puta noa i te FTA, kia tūhuratia hoki me pēwhea e mōhio pū ai ngā SME ki ngā āheinga i raro i te FTA (tae atu ki ngā huarahi e taea ai e ngā SME te whai wāhi mai ki ngā pūrongo e whaitake ana, e mārāma ana hoki) me whakatōmene hoki i ētahi huarahi e taea ai te taunaki i ngā SME, me ngā SME Māori kia whai hua i raro i te FTA.